



JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIÁRIU

Sumáriu Kazu
Tribunál Distritál Baukau
Edisaun Fevereiru 2019

Afirmasaun: Sumáriu Kazu tuir mai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la representa JSMP nia hanoin hanesan instituisaun ida. JSMP kondena maka'as forma violénsia hotu-hotu, liuliu hasoru feto no ema vulneravel. JSMP afirma la iha justifikasaun ba violénsia hasoru feto.

A. Sumáriu prosesu julgamentu kazu iha Tribunál Distritál Baukau

1. Totál kazu ne'ebé JSMP monitoriza: 28

Artigu	Tipu Kazu	Númeru
Artigu 145 (KP) & artigu 2, 3, no 35 (b) Lei Kontra Violénsia Doméstika (LKVD)	Ofensa ba integridade fízika simples ho natureza violénsia doméstika no tipu ilísitu sira kona-ba violénsia doméstika	19
Artigu 154 (KP)	Maus tratus ba kónjuje	2
Artigu 177 (KP) & artigu 182 (KP)	Abuzu seksuál ba menór ho agravasaun	1
Artigu 139 (KP), 23(KP) & artigu 2, 3, no 35 (b) (LKVD) & artigu 20 Lei Arma Brankas	Omisídiu agravadu ho forma tentada ho natureza violénsia doméstika no arma brankas	1
Artigu 243 (1) KP	Obstrusaun ba autoridade públiku	1
Artigu 20 Lei Arma Brankas Nú. 5/2017	Arma brankas	2
Artigu 140 (KP)	Omisídiu negligente	2
Totál		28

2. Totál desizaun ne'ebé JSMP monitoriza: 23

Tipu desizaun	Númeru
Pena prizaun (artigu 66 KP)	3
Suspensaun ba prizaun nia ezekusaun (artigu 68 KP)	15
Pena multa (artigu 67 KP)	4

Absolve	1
Totál	23

3. Totál kazu ne'ebé sei kontinua prosesu tuir JSMP nia monitorizasaun: 4

B. Deskripsaun sumáriu ba desizaun kazu sira ne'ebé JSMP monitoriza:

1. Krime ofensa ba integridade fízika simples ho natureza violénsia doméstika

Nú. Prosesu	: 0113/18.BCBCV
Kompozisaun Tribunál	: Singulár
Juis	: Dr. Afonso Carmona
Prokuradór	: Dr. Gustavo A. M. da Silva
Defeza	: Dr. Grigorio de Lima
Tipu pena	: Pena prizaun fulan 4 suspende ba tinan 1

Iha 01 Feveireiru 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu CCDC hasoru nia feen, iha Distritu Baukau.

Akuzasaun Prokuradór

Prokuradór akuza katak iha 07 Setembru 2018 tuku 16:00 lokraik, arguidu no lezada diskute malu kona-ba lezada deskonfia arguidu ba fetu seluk iha Dili, nune'e lezada dehan atu ba fó hatene nia maun hodi mai bolu/foti labarik ho lezada ba hela fali ho lezada nia maun. Arguidu la simu ho lezada nia hanoin/planu ne'e no arguidu tuku dala rua iha lezada nia-ulun rezulta bubu no moras. Lezada tenke ba hala'o tratamentu iha PRADET Baukau.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no artigu 36 LKVD.

Produsaun ba prova sira

Durante julgamentu arguidu deklara katak sira haksasuk malu kona-ba lezada deskonfia arguidu iha relasaun amante ho fetu seluk iha Dili no arguidu dehan ba lezada katak ne'e laloos. Maibé lezada koalia bei-beik, nune'e arguidu hirus no halo agresaun tuir faktu sira iha akuzasaun. Arguidu deklara katak nia arrepende ninia hahalok no nia rasik mak ba bolu lezada iha PRADET fila ba uma. Arguidu mós hatutan katak foin primeiravés mai hatan iha tribunál.

Iha parte seluk, lezada konfirma faktu hotu iha akuzasaun no deklara katak lezada rasik mak ba hato'o keixa iha polísia no lori lezada ba tratamentu iha PRADET Baukau.

Alegasaun finál

Prokuradór konsidera arguidu provadu komete krime hasoru lezada bazeia ba deklarasaun arguidu no depoimentu lezada nian. Prokuradór subliña katak Tribunál Distritál Baukau lor-loron julga kazu violénsia doméstika ne'ebé maioria mane mak sempre sai autór/arguidu ba krime sira ne'e. Tanba ne'e husu ba tribunál kondena arguidu tuir konviksaun tribunál nian.

Defeza haktuir katak arguidu konfesa faktu hotu iha akuzasaun, arrepende ona nia hahalok, diak malu ona ho lezada no foin primeiravés hatan iha tribunál. Tanba ne'e, husu ba tribunál atu aplika pena ne'ebé adekuadu ba arguidu.

Desizaun

Tribunál prova katak arguidu komete duni krime tuir faktu sira iha akuzasaun. Bazeia ba faktu provadu sira ne'e no sirkunstánsia atenuante sira hanesan arguidu konfesa, arrepende ona ninia hahalok, diak malu ona ho lezada no foin primeiravés hatan iha tribunál, tribunál kondena arguidu ho pena prizaun fulan haat suspende ba tinan ida inklui selu kustu judisiál US\$20.00.

2. Krime ofensa ba integridade fízika simples ho natureza violénsia doméstika

Nú. Prosesu	: 0027/18.VQSIC
Kompozisaun Tribunál	: Singulár
Juis	: Dr. Hugo da Cruz Pui
Prokuradór	: Dr. Domingos Goveia Barreto
Defeza	: Dr. Jose M. Guterres
Tipu pena	: Pena prizaun fulan 4 suspende ba tinan 1

Iha 05 Feveireiru 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JMdC hasoru nia feen, iha Distritu Vikeke.

Akuzasaun Prokuradór

Prokuradór akuza katak iha 24 Jullu 2018 tuku 22:00 kalan, lezada husu osan ba arguidu atu sosa foos no modo, maibé arguidu hatan ba lezada atu husu ba lezada nia inan-aman. Hafoin sira diskute malu no arguidu lori kadeira masa baku dala rua kona iha lezada nia kanuruk no liman loos, tuku dala rua iha lezada nia hasan no rezulta lezada sofre moras iha ulun, liman no hasan.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35 (b) no artigu 36 LKVD.

Produsaun ba prova sira

Durante julgamentu arguidu konfesa faktu hotu iha akuzasaun. Arguidu deklara katak arrepende ona nia hahalok, Arguidu promete ba tribunál katak sei la-komete tan krime hasoru lezada ka ema

seluk iha futuru, foin primeiravés mai hatan iha tribunál. Depoisde akontesimentu sira diak-malu ona no to'ogora moris hamutuk nafatin nu'udar feen laen. Arguidu servisu nu'udar motorista ho saláriu kada fulan US\$ 150.00 hodi sustenta família uma laran.

Iha parte seluk lezada konfirma faktu hotu iha akuzasaun no deklar mós katak diak malu ona ho arguidu no depoisde akontese to'ogora arguidu la baku ona lezada.

Alegasaun final

Prokuradór konsidera arguidu provadu komete krime hasoru lezada. Defaktu tuir-loloos arguidu mak nu'udar responsavel primária hodi sustenta nesiedade família la'os husu fali ema seluk atu hatan ba nesiedade família nian. Tanba ne'e, mezmu sira diak malu ona, maibé reflète katak krime violénsia doméstika ne'ebé sempre akontese bebeik husu tribunál aplika pena adekuaudu hodi garantia no prevene arguidu nia hahalok iha futuru. Prokuradór mós husu ba tribunál atu evita aplika pena multa ba arguidu, se lae arguidu sira toman selu multa no fila baku nafatin lezada.

Enkuantu defeza husu ba tribunál atu kondena arguidu ho pena ne'ebé adekuaudu tanba arguidu konfesa faktu sira, arrepende ona nia hahalok, foin primeiravés mai hatan iha tribunál no diak malu ona ho lezada no akontese to'ogora la baku ona lezada.

Desizaun

Depoisde avalia faktu hotu, tribunál prova katak arguidu komete duni krime tuir faktu sira iha akuzasaun. Bazeia ba faktu provadu sira ne'e no sirkunstánsia atenuante sira hanesan arguidu konfesa, arrepende ona ninia hahalok, diak malu ona ho lezada no foin primeiravés mai hatan iha tribunál, nune'e tribunál kondena arguidu ho pena prizaun fulan haat suspende ba tinan ida.

3. Krime arma brankas

Nú. Prosesu	: 0011/17.LALPL
Kompzisaun Tribunál	: Koletivu
Juis	: Dr. Jose Escurial, Dr. Hugo da Cruz Pui no Dr. Jose Goncalves
Prokuradór	: Dr. Gustavo A. M da Silva
Defeza	: Dr. Grigorio de Lima
Tipu pena	: Pena efetiva tinan 3 fulan 6

Iha 05 Feveiriu 2019, Tribunál Distritál Baukau prezide julgamentu leitura akordaun ba krime arma brankas ne'ebé envolve arguidu Inocencio Freitas hasoru Alexandre Freitas, iha Subdistritu Lospalos, Distritu Lautem.

Akuzasaun Prokuradór¹

¹ Kazu ne'e inisialmente prokuradór akuzo mós ho krime ofensa ba integridade fizika simples maibé tanba krime ne'e ho natureza semi publiku nune'e antes ba julgamentu tribunál halo tentativa konsiliaun ba parte-sira. Antes ida-ne'e

Prokuradór akuza katak, iha 13 Setembru 2018, tuku 22:00 kalan, iha bairu Kulu-hun, lezadu ho nia kolega sira tuur hela iha lezadu nia uma oin. Bainhira lezadu hamrik no hakat ba iha uma laran atu foti telemovel, lezadu rona ema barullu iha liur. Tanba ne'e lezadu sai mai liur haree nia kolega sira halai hotu ona. Lezadu haree arguidu ho nia maluk sira kaer sasan kro'at hanesan samurai, ai-pedasuk no besi kanu no hamrik heleu lezadu hafoin arguidu taa lezadu ho samurai dala ida iha lezadu nia ulun kotuk, kanek no ran sai barak.

Prokuradór akuza arguidu kontra artigu 20 Lei Nú. 5/2017 kona-ba Lei Arma Brankas.

Produsaun ba prova sira

Durante julgamentu, arguidu nega totalmente ba faktu sira iha akuzaaun no deklarata katak nia la taa lezadu no la hatene se mak taa lezadu. Aleinde ne'e arguidu mós deklarata ba tribunál katak lezadu ho nia grupu mak ba asalta arguidu ho nian maluk sira. Arguidu reforsa katak prova mak lezadu ho nia maluk sira ninia samurai ida oras ne'e dadaun iha hela xefe aldeia. Arguidu mós deklarata katak foin primeiravés mai hatan iha tribunál.

Entretantu, lezadu kontinua mantein faktu sira iha akuzasaun katak iha momentu ne'ebá arguidu ho nia kolega lubuk ida mak mai asaltu lezadu iha nia uma no lezadu haree arguidu ho samurai halai tuir lezadu ba uma laran no taa lezadu husi kotuk no kona ulun kotuk no rezulta kanek no ran sai barak.

Mariano F. Miranda, Domingos Soares, Gilberto Soares no Jezuncio Freitas nu'udar testemuña depoimenta ba tribunál katak iha momentu ne'ebá, testemuña sira tuur hela iha lezadu nia uma oin (veranda) no haree arguidu ho nia kolega sira mosu mai. Testemuña sira haree arguidu mak kaer samurai nune'e testemuña sira tauk halai namkari. Maibé sira deklarata katak kona-ba faktu sira arguidu taa lezadu, testemuña sira deklarata katak sira la iha koñesimentu tanba sira halai tiha ona.

Alegasaun finál

Maske iha produsaun ba prova sira, arguidu nega totalmente ba faktu prinsipál sira maibé lezadu konfirma faktu sira iha akuzasaun no testemuña na'in haat mós reforsa depoimentu lezadu nian katak arguidu mak kaer duni samurai ida ho mai asaltu iha lezadu iha nian uma. Prokuradór fiar liu ba lezadu nia deklarasaun no depoimentu testemuña sira nian. Tanba ne'e husu ba tribunál atu kondena arguidu tuir konviksaun tribunál nian.

mós parte-sira iha ona akordu dame. Tanba ne'e iha prosesu tentativa konsilisaun ne'e lezadu deziste keixakeixa hasoru arguidu nune'e tribunál omologa akordu parte sira no tribunál kontinua julgamentu ba krime arma brankas.

Entretantu parte defeza haktuir katak bazeia ba arguidu nia deklarasaun iha produsaun prova sira husu ba tribunál atu halo justisa ba arguidu.

Desizaun

Depoizde avalia faktu sira hotu, tribunál prova katak arguidu komete duni krime tuir faktu sira iha akuzasaun prokuradór nian ne'ebé konfirma hosi lezadu no reforsa hosi testemuña sira. Bazeia ba konsiderasaun hirak ne'e, tribunál konklui prosesu ne'e no kondena arguidu ho pena efetiva tinan tolu fulan neen.

4. Krime ofensa ba integridade fízika simples ho natureza violénsia doméstika

Nú. prosesu	: 0036/18. BCLGA
Kompozisaun Tribunál	: Singulár
Juis	: Dr. Jose Escurial
Prokuradór	: Dra. Remigia de Fatima da Silva
Defeza	: Dr. Jose M. Guterres
Tipu pena	: Pena multa US\$15.00

Iha 06 Feveireiru2019, Tribunál Distritál Baukau prezide julgamentu leitura sentensa ba krime ofensa ba integriade fízika simples ho natureza violénsia doméstika ne'ebé envolve arguidu FdCX hasoru nia feen, iha Distritu Baukau.

Akuzasaun prokuradór

Prokuradór akuza katak iha 08 Outubru 2018 tuku 14:00 lokraik, arguidu no lezada diskute malu kona-ba labarik tanis, hafoin arguidu hakbesik-an ba lezada no basa dala ida iha lezada nia ulun sorin-loos no rezulta moras no bubu.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Durante julgamentu arguidu deklara katak momentu ne'ebá lezada ba arguidu nia inan aman nia uma, lezada la lori ho labarik no husik labarik hela tanis maka'as iha uma, nune'e arguidu hirus no halo agresaun ba lezada. Hafoin lezada ba hato'o keixa iha polísia, maibé bainhira lezada fila hosi polísia arguidu diak malu fali ho lezada. Durante moris hamutuk arguidu foin primeiravés baku lezada no mai hatan iha tribunál. To'o agora arguidu no lezada moris hamutuk nafatin nu'udar feen-laen, no serbisu nu'udar negosiante kiik ho rezultadu sustenta deit ba família.

Iha parte seluk lezada konfirma faktu hotu iha akuzasaun no deklara katak depoizde akontesimentu ne'e lezada ba hato'o keixa iha polísia maibé la konsege ba halo tratamentu iha sentru saúde ruma.

Bainhira lezada fila hosi eskuadra polísia arguidu rasik husu deskulpa ba lezada no diak malu kedas to' o agora arguidu la baku ona lezada.

Alegasaun finál

Prokuradór haktuir katak arguidu konfesa faktu hotu iha akuzasaun. Tuir loloos arguidu mós iha obrigasaun atu haree labarik ne'ebé tanis la'os lezada deit. Arguidu nia konduta prenxe rekizitu sira hosi krime ne'ebé akuza ba nia. Tanba ne'e, husu ba tribunál aplika pena ne'ebé justu hodi prevene arguidu nia hahalok iha futuru.

Aleinde ne'e parte defeza haktuir katak arguidu konfesa faktu hotu iha akuzasaun, arguidu rasik hatudu nia arrendementu iha momentu ne'ebá kedas, bainhira lezada fila hosi polísia no sira dame malu ona. Durante moris hamutuk arguidu foin primeiravés halo ofensa hasoru lezada. Tanba ne'e husu ba tribunál aplika pena ne'ebé adekuada ba arguidu.

Desizaun

Depoide avalia faktu hotu, tribunál prova katak arguidu komete duni krime tuir faktu sira iha akuzasaun. Bazeia ba faktu provadu sira ne'e, tribunál konklui prosesu ne'e no kondena arguidu ho pena multa US\$ 15.00 ne'ebé sei selu 0.50 kada lora durante lora 30. Tribunál mós fiksa pena alternativa durante lora 20 prizaun, bainhira arguidu la kumpri pena multa ne'e.

5. Krime arma brankas

Nú. Prosesu	: 0008/18. VQVQQ
Kompozisaun Tribunál	: Koletivu
Juis	: Dra. Ersilia de Jesus, Dr. Jose Goncalves no Dr. Jose Escorial
Prokuradór	: Dr. Domingos Goveia Barreto
Defeza	: Dr. Grigorio de Lima
Tipu pena	: Pena prizaun tinan 3 suspende ba tinan 3

Iha 09 Feveireu 2019, Tribunál Distritál Baukau prezide julgamentu leitura akordaun ba krime arma brankas ne'ebé envolve arguidu Manuel Soares hasoru lezadu Januario Soares, iha Suku Umawain kraik, Sub-distritu Viqueque, Distritu Vikeke.

Akuzasaun Prokuradór²

Prokuradór akuza katak iha 22 Janeiru 2018, iha tuku 15:00 lokraik, lezadu ho biskaleta fa'an SDSB halai iha arguidu nia uma oin. Lezadu rona katak ema bolu, nune'e lezadu para biskaleta.

² Iha kazu ne'e mós insialmente prokurador akuza ho ofensa ba integridade fízika simples maibé ikusmai tribunál halo tentativa konsiliaun ba parte-sira no lezadu deziste keixakeixa hasoru arguidu, nune'e tribunál omologa akordu parte sira no kontinua julgamentu ba krime arma brankas.

Maibé derrepente lezadu haree arguidu mai ho katana taa kedas lezadu nia biskaleta roda oin no kotuk. Arguidu mós taa lezadu maibé la konsege kona, arguidu soe tiha katana tuku dala tolu iha lezadu nia oin no uza fatuk tuku dala ida iha lezadu nia hirus-matan.

Prokuradór akuza arguidu kontra artigu 20 husi lei Nú. 5/2017 kona-ba Lei Arma Brankas.

Produsaun ba prova sira

Durante julgamentu arguidu deklara katak momentu ne'e arguidu ho kondisaun lanu la hatene-an. Maibé arguidu rekoñese nian sala tuir faktu-sira iha akuzasaun. Arguidu nu'udar agrikultór ne'ebé nia produstu sira so hodi sustenta deit ba família hanesan nia feen no oan na'in neen. Foin primeiravés mai hatan iha tribunál, arrepende ona nia hahalok no promete sei la komete tan kualkér krime iha futuru.

Iha parte seluk lezadu kontinua konfirma faktu hotu iha akuzasaun kona ba arguidu uza katana taa lezadu nian biskaleta roda oin no kotuk no kontinua taa lezadu mak la konsege tanba lezadu halai.

Alegasaun finál

Prokuradór mantein nia akuzasaun katak arguidu nu'udar agrikultór loloos uza katana ne'e ba atividade agrikultór nian la'os utiliza katana ne'e ba fali krime. Arguidu nia hahalok ne'e prenxe krime arma brankas ne'ebé inputa nian. Tanba ne'e, husu ba tribunál atu aplika pena prizaun tinan tolu suspende ba tinan tolu.

Iha parte seluk defeza haktuir katak arguidu konfesa faktu hotu iha akuzasaun, arguidu nu'udar agrikultór, laiha rendementu ne'ebé fiksi, arguidu mak sustenta nia feen ho oan na'in neen, arrepende ona nia hahalok, foin primeiravés mai hatan iha tribunál no diak malu ona ho lezadu. Tanba ne'e husu ba tribunál fó pena ne'ebé justu hodi prevene arguidu nia hahalok iha futuru.

Desizaun

Depoizde avalia faktu sira hotu, tribunál prova katak arguidu komete duni krime tuir faktu sira iha prokuradór nia akuzasaun. Bazeia ba faktu provadu sira ne'e no sirkunstánsia atenuante sira ne'ebé relevante, nune'e tribunál kondena arguidu ho pena prizaun tinan tolu suspende ba tinan tolu.

6. Krime ofensa ba integridade fízika simples ho natureza violénsia doméstika

Nú. Prosesu	: 0025/18. VQWTL
Kompozisaun Tribunál	: Singulár
Juis	: Dr. Antonio Fonseca
Prokuradór	: Dr. Domingos Goveia Barreto
Defeza	: Dr. Grigorio de Lima
Tipu pena	: Pena prizaun fulan 1 ho balun suspende ba tinan 1

Iha 07 Feveireiru 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu RG hasoru nia feen, iha Distritu Vikeke.

Akuzasaun Prokuradór

Prokuradór akuza katak iha 25 Maiu 2018 tuku 14:00 lokraik lezada haruka arguidu ko'us sira nia oan ne'ebé sei ki'ik maibé arguidu rejeita nune'e sira haksesuk malu no arguidu tolok lezada, no hafoin foti fiu tali karegador telemovel nian baku dala ida iha lezada nianibun no hasan-loos. Aktu ne'e rezulta lezada sofre moras no bubu.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Durante julgamentu, arguidu deklara katak faktu sira no motivu problema ne'ebé iha akuzasaun ne'e loos hotu. Arguidu hatutan katak sira forma família iha tinan 2015 no iha oan na'in rua. Arguidu diak malu ona ho lezada, arrepende ona nia hahalok no desde akontesimentu ne'e to'o agora la baku ona lezada. Arguidu primeiravés baku lezada, nu'udar negosiante ki'ik no rendimentu ne'ebé hetan uza deit ba sustenta família.

Iha parte seluk lezada konfirma faktu sira iha akuzasaun sen rezerva durante moris hamutuk arguidu foin primeiravés baku lezada no depoisde akontese to'o agora arguidu la baku ona lezada.

Alegasaun finál

Prokuradór konsidera arguidu provadu komete krime hasoru lezada. Prokuradór mós akresenta katak arguidu mós iha obrigasaun hanesan atu haree labarik, la'os lezada deit. Prokuradór reflète katak iha Juridisaun Tribunál Baukau lor-loron kuaze prezide julgamentu ba krime violénsia doméstika. Tanba ne'e prokuradór dehan katak kestaun la'os hare deit ba sira dame malu maibé tenke prevene arguidu nia hahalok, nune'e bele evita nia hahalok iha futuru no fó lisaun ba sociedade. Tanba ne'e, husu ba tribunál kondena arguidu ho pena suspensaun ne'ebé adekuadu.

Aleinde ne'e parte defeza haktuir katak arguidu konfesa faktu hotu iha akuazasaun. Arguidu ho lezada forma família ho idade ne'ebé seidak maduru, sira iha oan hamutuk na'in rua, maibé foin primeiravés baku lezada. Arguidu mós arrepende ona nia hahalok no diak malu ona ho lezada. Tanba ne'e husu ba tribunál atu aplika pena ne'ebé adekuadu ba arguidu.

Desizaun

Tribunál prova katak arguidu komete duni krime tuir faktu sira iha akuzasaun. Bazeia ba faktu provadu sira ne'e no sirkunstánsia atenuante sira hanesan arguidu konfesa, arrepende ona ninia hahalok, diak malu ona ho lezada no foin primeiravés mai hatan iha tribunál, nune'e tribunál

kondena arguidu ho pena prizaun fulan ida ho balun suspende ba tinan ida inklui selu kustu judisiál US\$10.00.

7. Krime ofensa ba integridade fízika simples ho natureza violénsia doméstika

Nú. Prosesu : 0013/16. MNNTB
Kompozisaun Tribunál : Singulár
Juis : Dr. Jose Quintão
Prokuradór : Dr. Gustavo A. M. da Silva
Defeza : Dr. Sidonio M. Sarmiento
Tipu pena : Absolve

Iha 07 Feveireu 2019, Tribunál Distritál Baukau prezide julgamentu leitura sentensa-editál ba krime ofensa ba integridade fízika simples ho natureza violénsia doméstika ne'ebé envolve arguidu LG hasoru nia feen (editál), iha Distritu Manatuto.

Akuzasaun Prokuradór

Prokuradór akuza katak iha 26 Novembru 2016, tuku 21:00 kalan, arguidu konversa hela ho nia alin sira iha liur katak arguidu sei bolu feen ki'ik hosi Vikeke mai sira nia uma. Nune'e lezada iha uma laran rona no sai mai liur diskute malu, hafoin arguidu basa dala rua iha lezada nia hasan karuk. Tanba ne'e lezada mós fila tuku dala ida iha arguidu nia isin no arguidu basa tan dala tolu iha lezada nia hasan karuk no basa dala tolu iha hasan loos no rezulta lezada monu ba rai. Depoizde akontesimentu lezada ba tratamentu iha Sentru Saúde Natarbora.

Prokuradór akuza arguidu kontra artigu 145 KP kona-ba krime ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Durante julgamentu, arguidu hili direitu nonook. Entretantu tribunál la rona lezada nia depoimentu tanba tribunál la hetan lezada nia paradeiru, nune'e tribunál notifika lezada ho editál no kontinua julgamentu sein prezensa lezada nian.

Alegasaun finál

Prokuradór haktuir katak durante produsaun ba prova sira, arguidu hili direitu nonook no lezada editál maibé antes ne'e lezada fó ona nia deklarasaun ne'ebé junta ona iha prosesu no kompleta ho relatóriu médiku hamutuk ho faktu sira seluk. Tanba ne'e, husu ba tribunál atu halo justisa ba prosesu ne'e.

Enkuantu, defeza haktuir katak produsaun ba prova sira la prodús faktu ruma iha audíensia julgamentu. Tanba ne'e husu ba tribunál absolve arguidu hosi prosesu ne'e.

Desizaun

Depoisde avalia faktu hotu, tribunál haree katak iha produsaun ba prova arguidu uja direitu silénsiu (nonook) nune'e la prodús buat ruma iha audíensia julgamentu. Juis subliña liután katak desizaun juis nian la bele bazeia deit ba faktu sira iha akuzasaun prokuradór ne'ebé deskreve parsialmente deit hosi parte ida nune'e tribunál la bele ezamina no kruza faktu sira ne'e ho ekilíbriu. Tanba ne'e tribunál decide absolve arguidu hosi prosesu ne'e.

8. Krime abuzu seksuál ba menór ho agravasaun

Nú. Prosesu : 0003/18.MNLLB
Kompozisaun Tribunál : Koletivu
Juis : Dr. Antonio Fonseca, Dr. Hugo da Crus Pui no Dr. Jose Quintão
Prokuradór : Dr. Luis H. Da Cruz Rangel
Defeza : Dr. Grigorio de Lima
Tipu pena : Pena prizaun tinan 13 fulan 6

Iha 07 Feveireiru 2019, Tribunál Distritál Baukau prezide julgamentu leitura akordaun ba krime abuzu seksuál ba menór ho agravasaun ne'ebé envolve arguidu ES hasoru lezada ho idade tinan 11, iha Distritu Manatuto.

Akuzasaun Prokuradór

Prokuradór akuza katak iha 03 Marsu 2018, tuku 11:00 meiodia, lezada hafoin fila husi eskola to'o iha nia uma tama tiha ba uma laran atu troka, arguidu tama tuir uza liman taka lezada nia ibun, arguidu komesa kolu lezada nian ropa dudu monu lezada ba iha kama laran, arguidu mós kolu nian ropa, loke lezada nian kelen hafoin ho forsa halo relasaun seksuál ho lezada.

Prokuradór akuza arguidu kontra artigu 177 Nu. 1 KP kona-ba krime abuzu seksuál ba menór ho prátika koitu vajinál, koitu anál ka koitu orál ho labarik ne'ebé seidak iha tinan 14 sei hetan pena prizaun tinan 5 to'o tinan 20 no kontra artigu 182 Nu. 1(a) KP kona-ba agravasaun tanba lezada nia idade ki'ik liu tinan 12.

Produsaun ba prova sira

Durante julgamentu, arguidu deklara katak relasaun seksuál ne'e akontese duni maibé iha momentu ne'ebá lezada la'os fila hosi eskola, loos mak bainhira lezada halimar iha uma liur. Arguidu deklara katak lezada bolu arguidu ba uma laran, nune'e arguidu tama tuir lezada ba iha uma laran, haree lezada kolu hotu ona nia ropa taka ba didin kuak, nune'e sira halo duni relasaun seksuál maibé la to'o ezekula tanba lezada nia maluk sira balun halimar no hakilar hela iha liur, ne'e-duni arguidu sai fali mai liur. Maibé arguidu deklara katak arrepende ona nia hahalok no foin primeiravés mai hatan iha tribunál.

Entretantu, lezada kontinua mantein faktu sira iha akuzasaun, katak iha momentu ne'ebá lezada foin fila hosi eskola no troka tiha farda eskola nian no hatais fali tiha ona ropa uma nian. Derepente arguidu tama tuir ba lezada iha uma laran hodi taka lezada nia ibun ho liman loos, kolu lezada nia kalsa ho liman karuk, mezmu lezada liki-an atu kontra arguidu nia hahalok ne'e maibé arguidu latan lezada ba iha kama laran hafoin arguidu mós hasai nian ropa no obriga halo relasaun seksuál ho lezada. Lezada akresenta liután katak bainhira arguidu halo hela penetrasaun, señora ida ho inisial BS mai bolu lezada maibé lezada la konsege hatan tanba arguidu taka tiha lezada nian ibun ho liman no arguidu kontinua obriga halo relasaun to'o ejakula.

Testemuña BS nu'udar viziñu depoimenta katak momentu ne'ebá nia ba bolu lezada maibé la iha ema ruma hatan, nune'e testemuña hafuhu hosi didin kuak mak haree hetan arguidu halo relasaun seksuál ho lezada. Hafoin testemuña ba informa ba lezada nia maun nune'e lezada nian maun mai tebe odamatan. Testemuña tama ba uma laran haree arguidu hakfodak hatais kalsa laloos, lezada molik hela no testemuña mós haree hetan ran oituan iha lezada nian isin.

Alegasaun final

Prokuradór husu ba tribunal atu kondena arguidu ho pena prizaun tinan 20 ba arguidu tanba arguidu nia hahalok ne'e prenxe duni elementu ba krime abuzu seksuál ba menór ho agravasaun tanba lezada sei idade menór.

Enkuantu defeza argumenta katak arguidu konfesa katak sira halo duni relasaun seksuál maibé la'os obriga. Arguidu hatudu nia arrendementu tanba halo relasaun seksuál ho labarik ne'ebé idade menór, arguidu mós nu'udar ema ho kategoria idozu ona ka katuas liu tiha ona, la'o mós ladiak ka la'o ho aitonka deit. Tanba ne'e husu ba tribunál fó justisa ba arguidu tuir arguidu nia kondisaun.

Desizaun

Depoisde avalia faktu hotu, tribunál prova katak arguidu komete duni krime tuir faktu sira iha akuzasaun. Bazeia ba faktu provadu sira ne'e no sirkunstánsia atenuante sira hanesan arguidu konfesa, arrepende ona ninia hahalok, nune'e tribunál kondena arguidu ho pena prizaun tinan 13 fulan neen.

9. Krime ofensa ba integridade fízika simples ho natureza violénsia doméstika

Nú. Prosesu	: 0022/18.MNMNT
Kompozisaun Tribunál	: Singulár
Juis	: Dr. Afonso Carmona
Prokuradór	: Dr. Gustavo A. M. da Silva
Defeza	: Dr. Grigorio de Lima
Tipu pena	: Pena prizaun fulan 4 suspende ba tinan 1

Iha 11 Feveireiru 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu MSS hasoru nia feen, iha Distritu Manatuto.

Akuzasaun Prokuradór

Prokuradór akuza arguidu katak iha 14 Abril 2018, arguidu kaer lezada nia faru no aperta lezada ba iha parede, basa dala ida iha lezada nia hasan loos no rasta lezada nia kabas kona iha parede no rezulta moras. Aktu hirak-ne'e rezulta lezada tenke ba halo tratamentu iha Sentru Saúde Manatuto.

Prokuradór akuza arguidu kontra artigu 145 KP kona-ba krime ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Durante julgamentu, arguidu deklara katak sira konverse halimar maibé lezada kestiona arguidu nia namorada sira iha tempu pasadu. Lezada koalia bei-beik no sai arguidu hirus no halo agresaun hasoru lezada tuir faktu sira iha kuzasaun. Arguidu mós deklara katak arrepende ona nia hahalok, diak malu ona ho lezada, to'o agora la baku ona lezada no foin primeiravés mai hatan iha tribunál. Aleinde ne'e lezada mós kontinua konfirma faktu sira iha akuzasaun no arguidu nia deklarasaun katak sira diak malu ona.

Alegasaun finál

Prokuradór mantein akuzasaun tanba konsidera arguidu provadu komete krime hasoru lezada bazeia ba deklarasaun arguidu nian no deklarasaun hosi lezada. Ba interese prevensaun iha futuru tanba volume krime violénsia doméstika iha juridisaun Baukau, husu ba tribunál atu kondena arguidu ho pena adekuada tuir konviksaun tribunál nian.

Defeza haktuir katak arguidu konfesa faktu hotu iha akuzasaun, arguidu ho lezada forma família kleur ona, foin primeiravés komete krime hasoru lezada, arrepende ona nia hahalok, diak malu ona ho lezada. Tanba ne'e husu ba tribunál aplika pena ne'ebé mak adekuadu ba arguidu.

Desizaun

Depoisde avalia faktu hotu, tribunál prova katak arguidu komete duni krime tuir faktu sira iha akuzasaun. Bazeia ba faktu provadu sira ne'e no sirkunstánsia atenuante sira hanesan arguidu konfesa, arrepende ona ninia hahalok, diak malu ona ho lezada, nune'e tribunál kondena arguidu ho pena prizaun fulan neen suspende ba tinan ida.

10. Krime ofensa ba integridade fízika simples ho natureza violénsia doméstika

Nú. prosesu : 0050/18.LASIC
Kompozisaun Tribunál : Singulár
Juis : Dr. Jose Goncalves

Prokuradór : Dr. Gustavo A. M. da Silva
Defeza : Dr. Sidonio M. Sarmiento
Tipu pena : Pena multa US\$180.00

Iha 11 Feveiru 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AdG hasoru nia feen, iha Distritu Lautem.

Akuzasaun Prokuradór

Prokuradór akuza arguidu katak iha 23 Juñu 2018, tuku 20:00 kalan, arguidu ho lezada diskute malu tanba arguidu simu telefone hosi ema deskoñesidu no bainhira arguidu sei ko'alia hela ho telefone lezada husu bei-beik. Depoisde arguidu ko'alia hotu telefone, arguidu dehan ba lezada katak lezada ko'alia tun-sae mak agora sira hasoru problema. Lezada hatan ba arguidu katak nia la hatene problema saida? Derepente arguidu tebe dala ida iha lezada nia kelen no kona mós liman hafoin lezada halai ba hato'o keixa iha polísia no ba tratamentu iha PRADET.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Durante julgamentu arguidu konfesa integralmente faktu sira ba tribunál. Depoisde akontese lezada ba hela iha uma mahon durante semana ida hafoin arguidu rasik ba bolu lezada fila ba uma. Arguidu ba fó hatene família rua tuur hamutuk rezolve no hadame malu to'o agora moris hamutuk nu'udar feen laen. Arguidu deklara katak nia arrende ona nia hahalok.

Aleinde ne'e lezada mós kontinua konfirma faktu sira iha akuzasaun no konfirma mós deklarasaun arguidu nian katak sira diak malu ona perante família rua nian oin. Depoisde akontesimentu ne'e to'o agora arguidu la baku ona lezada.

Alegasaun final

Prokuradór dehan katak arguidu konfesa faktu hotu iha akuzasaun no lezada mós mai konfirma katak arguidu komete duni krime hasoru lezada nu'udar nian feen. Tuir loloos arguidu mak proteje lezada ho oan sira hotu maibé pelu-kontráriu arguidu kria fali ambiente violénsia iha uma laran. Tanba ne'e husu ba tribunál kondena arguidu ho pena justa tuir konviksaun tribunál nian.

Iha parte seluk, defeza iha ninia alegasaun katak arguidu konfesa faktu hotu iha akuzasaun, arrende ba nia hahalok. Depoisde akontese arguidu hatudu vontade diak atu ba bolu lezada iha uma mahon no halibur hamutuk família rua hodi rezolve no sira nia problema no to'o agora sira moris ona iha armonia laran. Bazeia ba razaun hirak-ne'e, husu ba tribunál aplika pena ne'ebé kmaan ba arguidu.

Desizaun

Tribunál prova katak arguidu komete duni krime tuir faktu sira iha akuzasaun. Bazeia ba faktu provadu sira ne'e, tribunál konklui prosesu ne'e no kondena arguidu ho pena multa US\$180.00 ne'ebé sei selu US\$2.00 kada loron durante loron 90 inklui kondena arguidu selu kustu judisiál US\$ 10.00. Tribunál mós fiksa pena alternativa durante loron 60 prizaun, bainhira arguidu la kumpri pena multa refere.

11. Krime ofensa ba integridade fízika simples ho natureza violénsia doméstika

Nú. Prosesu : 0012/18. BCQLC
Kompozisaun Tribunál : Singulár
Juis : Dr. Jose Goncalves
Prokuradór : Dr. Gustavo A. M. da Silva
Defeza : Dr. Sidonio M. Sarmiento
Tipu pena : Pena prizaun tinan 1 suspende ba tinan 2

Iha 11 Feveireu 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu ASB hasoru nia feen, iha Distritu Baukau.

Akuzasaun Prokuradór

Prokuradór akuza katak maizumenus iha fulan-Maiu 2018, iha tuku 08:00 dadeer, arguidu buka nia osan US\$ 0.50 no husu ba lezada maibé lezada hatan osan ohin labarik mak foti. Hafoin lezada husu ba labarik dehan katak osan nia sosa ona sabaun. Arguidu rona tiha lezada nia resposta, arguidu hahuu tolok lezada. Arguidu mós tuku dala ida iha lezada niaibun, foti ai-sanak baku dala ida iha lezada nia kotuk laran, dala ida iha liman sikun loos no tuku dala ida iha matan-fukun no hetan kanek no ran. Depoizde akontesimetu ne'e, polísia mai lori lezada ba halo tratamentu iha Sentru Saúde Quilicai.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa.

Produsaun ba prova sira

Durante julgamentu, arguidu deklara katak osan US\$0.50 lakon, arguidu husu, lezada hatan la hatene, la kleur dehan labarik mak foti ne'e mak arguidu hirus halo agresaun hasoru lezada tuir faktu sira iha akuzasun. Depoizde akontese la kleur polísia mai tula lezada ba Sentru Saúde Quilicai no polísia balun lori arguidu ba eskuadra polísia Quilicai. Bainhira arguidu iha sela polísia, iha kalan lezada mak lori hahan ba arguidu. Arguidu deklara katak bainhira haree lezada nia diak, arguidu sente arrepende ba nia hahalok. Iha momentu ne'ebá, arguidu husu kedas deskulpa ba lezada. Hafoin fila ba uma moris hamutuk nu'udar feen-laen to'o agora no la baku ona lezada. Arguidu dehan katak nia foin primeiravés mai hatan iha tribunál.

Iha parte seluk lezada konfirma faktu hotu iha akuzasaun katak depoisde akontese derrepente polísia to’o tula lezada ba sentru saúde Quilicai. Lezada deklara katak nia sofre kanek iha matanfukun no hetan suku pontu tolu no simu aimoruk fila ba uma. Lezada konfirma katak nia mak lori hahan ba arguidu iha sela polísia no akontese to’o arguidu la baku ona lezada.

Alegasaun final

Prokuradór haktuir katak bazeia ba deklarasaun arguidu nian no lezada nian hatudu katak arguidu provadu komete krime hasoru lezada. Maibé sira buka meius atu rezolve problema ne’e no arguidu promete ona katak sei la repete ninia hahalok. Mezmu nune’e, atu asegura katak arguidu kaer nia promessa sira, husu ba tribunál atu kondena arguidu ho pena justu tuir konviksaun tribunál nian.

Iha parte seluk defeza haktuir katak arguidu konfesa faktu hotu iha akuzasaun, arguidu halo reflesaun no ezame konsensia bainhira detein hela iha sela polísia no lezada ba vizita arguidu. Aguidu hatudu nia arrependementu no husu deskulpa ba lezada no fila ba uma la baku lezada to’o agora no kazu ne’e nu’udar kazu primeiravés ba arguidu mai hatan iha tribunál. Tanba ne’e husu ba tribunál aplika pena ne’ebé kmaan ba arguidu.

Desizaun

Tribunál prova katak arguidu komete duni krime tuir faktu sira iha akuzasaun. Bazeia ba faktu provadu sira ne’e no sirkunstánsia atenuante sira hanesan arguidu konfesa, arrepende ona ninia hahalok, diak malu ona ho lezada no foin primeiravés mai hatan iha tribunál, nune’e tribunál kondena arguidu ho pena prizaun tinan ida suspende ba tinan rua.

12. Krime ofensa ba integridade física simples ho natureza violência doméstica

Nú. Prosesu	: 0088/18. PDBAU
Kompozisaun Tribunal	: Singulár
Juis	: Dr. Jose Quintão
Prokuradór	: Dr. Gustavo A. M. da Silva
Defeza	: Dra. Mujariah (advogada privada)
Tipu pena	: Pena multa US\$15.00

Iha 12 Feveireu 2019, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violência doméstica ne’ebé envolve arguidu PdJS hasoru nia feen, iha Distritu Vikeke.

Akuzasaun Prokuradór

Prokuradór akuza katak iha 21 Setembru 2018, tuku 18:30 lokraik, tanba lezada eskola iha Dili, nune’e arguidu ho lezada fila hosi Dili ho bis hamutuk atu ba Watulari. Bainhira to’o iha área Suku Wailili Munisípiu Baukau nian, iha kareta laran arguidu husu lezada nia telemovel atu haree lezada

nia *facebook* maibé lezada rejeita atu fó-ba arguidu. Nune'e arguidu hadau lezada nia telemovel no basa dala ida iha lezada hasan karuk no tata dala ida iha lezada nina liman karuk, hafoin lezada ba hato'o keixa iha polisia Watulari.

Prokurador akuza arguidu kontra artigu 145 KP kona-ba ofensa ba integridade fizika simples ho nia moldura penal to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Durante julgamentu, arguidu deklara katak durante sira iha bis laran, arguidu husu lezada nia telemovel atu haree lezada nia *facebook* maibé lezada rejeita no arguidu hirus hodi halo duni agresaun hasoru lezada tuir faktu sira iha akuzasaun. Depoisde akontese ne'e, to'o Watulari lezada ba hato'o keixa iha polisia, no fó-hatene familia rua rezolve tuir dalan kultura no lezada decide sira moris separa. Maibé arguidu deklara katak nia arrepende ona nia hahalok, foin primeiravés mai hatan iha tribunál.

Iha parte seluk, lezada konfirma faktu sira iha akuzasaun, lezada decide moris separa ona ho arguidu tanba foin moris hamutuk iha tinan 2016 seidak iha oan arguidu halo ona agresaun hasoru lezada.

Alegasaun final

Prokurador haktuir katak arguidu konfesa faktu hotu iha akuzasaun. Maske sira moris separa ona, maibé arguidu ho lezada ne'ebé ho idade naton no sei moris hamutuk iha suku ida, prokurador fiar katak iha possibilidade katak sira sei halo interasaun ba malu nomos atu fó-lisaun pozitivu ba sociedade, husu ba tribunál kondena arguidu ho pena adekuaudu tuir konviksaun tribunál nian.

Aleinde ne'e, defeza haktuir katak arguidu konfesa faktu hotu iha akuzasaun maibé motivasaun iha akuzasaun no produsaun prova sira hatudu katak provokasaun ne'e mai hosi lezada. Arguidu nu'udar laen iha direitu atu hatene saida mak lezada halo tanba ohin loron ho evolusaun mundu nian agora lori risku barak ba familia sira. Mezmu nune'e, arguidu mós arrepende ona nia hahalok, diak malu ona ho lezada maske sira moris separa. Tanba ne'e, husu ba tribunál atu aplika pena ne'ebé kmaan ba arguidu.

Desizaun

Tribunál prova katak arguidu komete duni krime tuir faktu sira iha akuzasaun. Bazeia ba prova sira ne'e, tribunál kondena arguidu ho pena multa US\$15.00 ne'ebé sei selu US\$ 0.50 kada loron durante loron 30 inklui selu kustu judisial US\$ 10.00. Tribunál mós fiksa pena alternativa durante loron 20 prizaun, bainhira arguidu la kumpri pena multa refere.

13. Krime ofensa ba integridade fizika simples ho natureza violénsia doméstika

Nú. Prosesu

: 0020/18.BCBCV

Kompozisaun Tribunál : Singulár
Juis : Dr. Jose Escorial
Prokuradór : Dr. Luis H. Rangel da Cruz
Defeza : Dr. Antonio Fernandes
Tipu pena : Pena prizaun fulan 3 suspende ba tinan 1

Iha 13 Feveireiru 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AMdP hasoru nia feen, iha Distritu Baukau.

Akuzasaun Prokuradór

Prokuradór akuza katak iha 30 Outubru 2018, tuku 11:00 meudia, arguidu tuku dala ida iha lezada nian hasan karuk no rezulta lezada monu ba rai, hafoin lezada hadeer fali arguidu tuku tan dala ida iha lezada nian kotuk laran no rezulta moras. Lezada ba halo tratamentu iha Sentru Saúde Venilale no simu aimoruk fila-fali ba uma.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova

Durante julgamentu, arguidu deklara katak haree lezada histori malu fali ho arguidu nia maun ne'ebé moras mental no hafoin arguidu ba hasé netik maibé lezada fila histori malu fali ho arguidu. Tanba ne'e mak arguidu hirus no komete agresaun hasoru lezada tuir faktu sira iha akuzasaun. Arguidu diak malu fali ho lezada, husu ona deskulpa ba lezada no to'o agora la baku ona lezada. Arguidu laiha antesidente kriminál no perante tribunal arguidu promete katak sei la halo tan aktu sira hanesan hasoru lezada ka membru família iha futuru.

Iha parte seluk lezada mós mai konfirma akuzasaun no konfirma mós arguidu nia deklarasaun katak agora moris hamutuk nafatin nu'udar feen-laen. Desde akontese to'o agora arguidu la baku ona.

Alegasaun finál

Prokuradór haktuir katak loloos arguidu bolu lezada ko'alia didiak hodi bele rezolve problema ne'e. Lei la permite arguidu atu uza violénsia hodi rezolve problema. Arguidu nia konduta ne'e prenxe rekizitu sira hosi krime ne'ebé prokuradór akuza ba nia. Bazeia ba razaun hirak-ne'e husu ba tribunál kastigu arguidu ba pena prizaun fulan tolu suspende ba tinan ida.

Defeza haktuir katak arguidu konfesa faktu hotu iha akuazasaun. Arguidu hatudu nia arrependementu iha loron ne'e kedas, bainhira lezada fila fila hosi ospital arguidu buka lezada no diak malu fali ho lezada. To'o agora arguidu la baku ona lezada no foin primeiravés mai hatan

tribunál. Tanba ne'e husu ba tribunál aplika pena ne'ebé justu atu garantia arguidu ho lezada nian moris iha futuru.

Desizaun

Depoisde avalia faktu hotu, tribunál prova katak arguidu komete duni krime tuir faktu sira iha akuzasaun. Tribunál mós konsidera sirkunstánsia atenuante sira hanesan arguidu konfesa, arrepende ona ninia hahalok, diak malu ona ho lezada no foin primeiravés mai hatan iha tribunál, nune'e tribunál kondena arguidu ho pena prizaun fulan tolu suspende ba tinan ida.

14. Krime ofensa ba integridade fízika simples ho natureza violénsia doméstika

Nú. prosesu : 0024/18. BCEVN
Kompozisaun Tribunál : Singulár
Juis : Dra. Ersilia de Jesus
Prokuradór : Dr. Gustavo A. M. da Silva
Defeza : Dr. Sidonio M. Sarmiento
Tipu pena : Pena multa US\$15.00

Iha 12 Feveireu 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu MJdR hasoru nia feen, iha Distritu Baukau.

Akuzasaun prokuradór

Prokuradór akuza arguidu katak iha 15 Novembru 2018 iha tuku 14:00 lokraik, arguidu deskonfia lezada fa'an tiha foos han nian, nune'e arguidu ho lezada diskute malu. Aarguidu nervozu lori alu ki'ik fai aimanas nian baku dala ida iha lezada nian kabun. Aleinde ne'e arguidu basa dala rua ba iha lezada nianibun laran, tebe dala ida iha lezada nian kotuk laran no rakut lezada nian fu'uk hodi hanehan ba iha hadak leten.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Durante julgamentu, arguidu deklara katak momentu ko'alia ho viziñu sira, mak sira konta katak lezada fa'an foos, nune'e mak arguidu sente mo'e no hirus baku lezada hanesan faktu iha akuzasaun. Deposide akontese lezada ba hela iha nia maun nian uma, hafoin liutiha loron rua, arguidu ba fó hatene lezada nian maun sira tuur hamutuk hodi rezolve fali sira nian problema. To'o agora sira diak malu ona no arguidu la baku ona lezada, arrepende ba nia hahalok no perante tribunál arguidu promete katak sei la baku tan lezada no arguidu mós foin primeiravés mai hatan iha tribunál.

Iha parte seluk lezada konfirma faktu sira akuzasaun no konfirma mós ho deklarasaun arguidu nian katak arguidu la baku ona lezada no diak malu ona. Durante moris hamutuk, arguidu foin primeiravés halo agresaun hasoru lezada. Lezada mós deklara katak se ba oin mak arguidu baku tan lezada nia sei informa fali ba polísia.

Alegasaun finál

Prokuradór haktuir katak arguidu konfesa faktu hotu iha akuzasaun no lezada mós konfirma faktu provadu sira katak arguidu komete duni krime hasoru nia feen. Tanba ne'e atu halo prevensaun ba krime ho natureza violénsia doméstika ne'ebé aumenta hosi loron ba loron, husu ba tribunál atu kondena arguidu ho pena ne'ebé adekuada tuir artigu 145 KP.

Aleinde ne'e, parte defeza haktuir katak arguidu konfesa faktu hotu iha akuzasaun, diak malu ona ho lezada, arrepende nia hahalok no laiha antesidente kriminál. Tanba ne'e husu ba tribunál atu aplika pena ne'ebé kmaan ba arguidu.

Desizaun

Depoizde avalia faktu hotu, tribunál prova katak arguidu komete duni krime tuir faktu sira iha akuzasaun. Bazeia ba faktu provadu sira ne'e, tribunál kondena arguidu ho pena multa US\$15.00 ne'ebé sei selu US\$ 0.50 kada loron durante loron 30 inklui selu kustu judisiál US\$ 10.00. Tribunál mós fiksa pena alternativa durante loron 20 prizaun, bainhira arguidu la kumpri pena multa refere.

15. Krime ofensa ba integridade fízika simples ho natureza violénsia doméstika

Nú. prosesu	: 0077/17. LASIC
Kompozisaun Tribunál	: Singulár
Juis	: Dr. Hugo da Cruz Pui
Prokuradór	: Dr. Remigia de Fatima da Silva
Defeza	: Dr. Sidonio M. Sarmento
Tipu pena	: Pena prizaun fulan 4 suspende ba tinan 1

Iha 19 Feveireiru 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu BdC hasoru nia aman, iha Distritu Lautem.

Akuzasaun Prokuradór

Prokuradór akuza katak iha 26 Dezembru 2017, tuku 18:50 kalan, lezadu toba hela iha uma laran derrepente arguidu mosu mai foti katana nia knu'uk baku dala rua iha lezadu nia kotuk laran, baku dala ida iha ain tuur, basa dala ida iha hasan parte karuk no rasta lezadu to'o monu ba rai.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Durante julgamentu, arguidu deklara katak momentu iha mate uma, lezadu hemu tua to'o lanu no koalia barak loos hanesan labarik no to'o lezadu mi-an no ema kous deit mak ba uma. Arguidu nu'udar oan sente moe nune'e, arguidu hirus ba tuir to'o uma, hodi halo agresaun hasoru lezadu tuir faktu iha akuzasaun. Arguidu ho lezadu diak malu fali ona, foin primeiravés mai hatan iha tribunal, arguidu arrepende ba nia hahalok tanba baku fali lezadu nu'udar nian aman.

Aleinde ne'e lezadu mós kontinua konfirma faktu sira iha akuzasaun no konfirma mós arguidu nian deklarasaun katak sira diak malu ona. Depoisode akontese to'o agora lezadu mós lakohi ona hemu tua, atu evita violénsia uma laran no lezadu halo ba tratamentu iha Sentru Saúde Lospalos hafoin simu ai-moruk fila ba uma.

Alegasaun finál

Prokuradór haktuir katak iha produsaun ba prova arguidu konfesa faktu sira ne'ebé imputa ba nia. Maibé prokuradór la admite maneira ka meius ne'ebé arguidu uja hasoru nia-aman rasik. Prokuradór hatutan katak bainhira ema-ida lanu ona ema ne'ebé matan-moos tenke buka meius seluk atu prevene, la'os uza fali violénsia mak prevene lezadu nia hahalok. Satan ida-ne'e hasoru arguidu ninia-aman rasik. Arguidu nia konduta ne'e prenxe krime ofensa ba integridade fízika simples ho natureza violénsia doméstika. Tanba-ne'e, husu ba tribunál kondena arguidu ho pena ne'ebé adekuaudu nune'e arguidu bele evita nia hahalok iha futuru.

Defeza haktuir katak arguidu konfesa faktu hotu iha akuazasaun, maibé iha motivasaun ne'e arguidu mak sente moe tanba tempu ne'e família matebian iha tristeza nia laran, lezadu ho kondisaun lanu halo fali teatru, ema barak hobur, to'o lezadu mi-an. Arguidu kooperera justisa, arrepende ona nia hahalok, diak malu ona ho lezadu no foin primeiravés mai hatan iha tribunál. Tanba ne'e husu ba tribunál atu aplika pena ne'ebé kmaan no razoavel ba arguidu.

Desizaun

Tribunál prova katak arguidu komete duni krime tuir faktu sira iha akuzasaun. Tribunál mós avalia faktu provadu sira ne'e no sirkunstánsia atenuante sira hanesan arguidu rekoñese no arrepende ona ninia hahalok, diak malu ona ho lezada no foin primeiravés mai hatan iha tribunál. Tanba ne'e tribunál konklui no kondena arguidu ho pena prizaun fulan haat suspende ba tinan ida.

16. Krime ofensa ba integridade fízika simples ho natureza violénsia doméstika

Nú. Prosesu	: 0022/18.BCLGA
Kompozisaun Tribunál	: Singulár
Juis	: Dra. Ersília de Jesus
Prokuradór	: Dr. Gustavo A. M. da Silva
Defeza	: Dr. Grigorio de Lima
Tipu pena	: Pena prizaun fulan 4 suspende ba tinan 1 fulan 6

Iha 19 Feveireiru 2019, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu AVdC hasoru nia nia feen, iha Distritu Baukau.

Akuzasaun Prokuradór

Prokuradór akuza katak iha 04 Agostu 2018 tuku 22:00, lezada ho sira nia oan ki'ik ba tuir arguidu iha arguidu nia inan-aman sira nia uma tanba durante loron haat ona arguidu la fila ba uma. Bainhira lezada ho sira nia oan la'o hasoru arguidu iha dalan, nune'e argudu tula deit sira nia oan no lezada la'o mesak. Depoisde to'o iha arguidu nia inana-aman nia uma, lezada loke odamatan tama ba uma laran, maibé arguidu la koalia buat ruma, arguidu tuku dala rua iha lezada nia ulun, tebe dala barak iha lezada nia ain kabun sorin-karuk, kaer lezada nian kanuruk riba ba kama laran. Depois ikusmai deskobre katak arguidu hakarak hola tan fetu seluk, maibé lezada la aseita. Arguidu moris hamutuk iha tinan 2006 to'o agora sira iha ona oan na'in lima.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Arguidu deklara katak momentu ne'ebá kalan ona, lezada ko'us sira nia oan ne'ebé sei ki'ik la'o iha dalan públiku nune'e arguidu komete krime hirak-ne'e tuir faktu iha akuzasaun. Maibé arguidu mós deklara katak nia moris ona ho nia feen-kiik, arrepende ona nian hahalok, no sei la halo agresaun hasoru membru família iha futuru, foin primeiravés mai hatan iha tribunál.

Lezada mantein faktu sira iha akuzasaun no deklara katak arguidu hola tan ona fetu seluk no husik hela lezada ho labarik na'in lima iha uma. Tanba ne'e lezada deside lori labarik na'in lima ba hotu lezada nia inan-aman nia uma. Lezada deklara katak durante ne'e arguidu la sustenta ona lezada no oan sira.

Alegasaun final

Prokuradór konsidera arguidu provadu komete krime hasoru lezada bazeia ba lezada no arguidu nia deklarasaun. Arguidu mós to'o agora la sustenta lezada ho nia oan sira, seidak diak malu, nune'e atu halo prevensaun ba arguidu nia hahalok hodi bele muda nia hahalok iha futuru mezmu hola ona fetu seluk. Tanba ne'e husu ba tribunal atu kondena arguidu ho pena ne'ebé adekuadu tuir lei no konviksaun tribunál nian.

Aleinde ne'e defeza mós husu ba tribunál atu aplika pena ne'ebé adekuadu ba arguidu atu asegura arguidu la bele komete tan krime hasoru lezada no ema seluk iha futuru. Iha audiénsia arguidu konfesa faktu hotu ne'ebé prokuradór imputa ba nia, arrepende ona nia hahalok no foin primeiravés hatan iha tribunál.

Desizaun

Tribunál prova katak arguidu komete duni krime tuir faktu sira iha akuzasaun. Tribunál mós avalia sirkunstánsia atenuante sira hanesan arguidu konfesa, arrepende ona ninia hahalok, foin primeiravés mai hatan iha tribunal. Bazeia ba konsiderasaun sira ne'e, tribunál konklui prosesu ne'e no kondena arguidu ho pena prizaun fulan haat suspende ba tinan ida fulan neen inklui selu kustu judisiál US\$ 10.00.

17. Krime ofensa ba integridade fízika simples ho natureza violénsia doméstika

Nú. Prosesu : 0157/18.BCBCV
Kompozisaun Tribunál : Singulár
Juis : Dra. Ersilia de Jesus
Prokuradór : Dr. Gustavo A. M. da Silva
Defeza : Dr. Antonio Fernandes
Tipu pena : Pena prizaun fulan 6 suspende ba tinan 1 fulan 6

Iha 19 Feveireiru 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JX hasoru nia nia feen, iha Distritu Baukau.

Akuzasaun Prokuradór

Prokuradór akuza katak iha 28 Novembru 2017, iha tuku 07:00 dadeer, lezada hamoos hela rai ka kintál atu kuda modo. La kleur, arguidu mosu mai no haruka lezada ba hamoos batar du'ut, maibé lezada lakohi tanba batar foin kuda lora tolu. Hafoin sira hahú diskute malu, no arguidu foti nuu kelen baku dala barak iha lezada nia liman no rezulta moras no bubu. Arguidu tebe dala barak iha lezada nian isin no rezulta moras no bubu. Depoisde akontesimentu ne'e lezada ba hato'o keixa iha Ofisiál Polísia Suku (OPS) no kontinua ba tratamentu iha Sentru Saúde Baukau Vila.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Durante julgamentu arguidu konfesa integralmente faktu sira ba tribunál, diak malu ona ho lezada no arrepende ona nia hahalok. Arguidu deklara katak foin primeiravés baku lezada no to'o agora la baku ona lezada. Arguidu mós deklara katak foin primeiravés hatan ihá tribunal no moris hamutuk ho lezada hosi tinan 1996 no iha oan na'in lima.

Iha parte seluk, lezada mantein faktu sira iha akuzasaun laran no deklara katak bainhira lezada fila hosi eskadra polísia, liu lora ida arguidu buka diak malu fali ho lezada no to'o agora la baku ona lezada. Lezada konfirma katak antes ne'e mós arguidu *nunka-mais* baku lezada.

Alegasaun finál

Prokuradór haktuir katak arguidu konfesa faktu hotu iha akuzasaun. Ne'e signifika arguidu provadu komete krime hasoru lezada ne'ebé nia feen rasik. Tanba ne'e husu tribunál aplika medida prevensaun espesiál ba arguidu no prevensaun jerál ba comunidade atu hatene katak nu'udar feen-laen rezolve problema la'os ho violénsia maibé buka dalan seluk liuhosi komunikasaun diak hodi rezolve problema. Bazeia ba razaun hirak-ne'e husu ba tribunál atu kondena arguidu ho pena adekuadu tuir provizaun artigu 145 KP no konviksaun tribunál nian.

Defeza haktuir katak arguidu konfesa faktu hotu iha akuazasaun, haree arguidu no lezada nia deklarasaun katak moris hamutuk iha tempu naruuk maibé foin primeiravés baku lezada. Aleinde ne'e arguidu hatdu katak nia arrepende ona nia hahalok tanba ne'e liu loron ida deit arguidu rasik buka meu diak malu fali ho lezada. Tanba ne'e husu ba tribunál aplika pena ne'ebé adekuadu ba arguidu.

Desizaun

Depoide avalia faktu hotu, tribunál prova katak arguidu komete duni krime tuir faktu sira iha akuzasaun. Bazeia ba faktu provadu sira ne'e, tribunál konklui prosesu ne'e no kondena arguidu ho pena prizaun fulan neen suspende ba tinan ida fulan neen no selu mós kustu judisiál US\$10.00.

18. Krime omisídiu agravadu ho forma tentada ho natureza violénsia doméstika no arma brankas

Nú. Prosesu	: 0034/18.LASIC
Kompozisaun Tribunál	: Koletivu
Juis	: Dr. Jose Gonsalves, Dra. Ersilia de Jesus no Dr. Jose Escurial
Prokuradór	: Dr. Luis H. Rangel da Cruz
Defeza	: Dr. Antonio Fernandes
Tipu pena	: Pena prizaun tinan 8

Iha 21 Feveireiru 2019, Tribunál Distritál Baukau prezide julgamentu leitura akordaun ba krime omisídiu agravadu forma tentada ho natureza violénsia doméstika no arma brankas ne'ebé envolve arguidu Adino da Costa hasoru nia maun Angelmo da Costa, iha Distritu Lautem.

Akuzasaun Prokuradór

Prokuradór akuza katak iha 26 Abril 2019, tuku 13:25 meudia, lezadu nia feen fila hosi merkadu ba uma no dehan ba lezadu ho arguidu katak tais ne'ebé lori ba fa'an ema la hola ida. Arguidu husu ba lezadu nia-feen katak keta lezadu nia-feen troka fali tais ne'e ba tais seluk karik. Tanba ne'e lezadu rona no diskute malu ho arguidu. Hafoin lezadu haree arguidu ba uma laran foti diman no lori atu fai iha lezadu nia oin no lezadu fila atu halai maibé arguidu sona tuir fali iha lezadu nia kidan. Hafoin polísia to'o arguidu entrga'an ba polísia. Polísia lori lezadu ba Sentru Saúde Lospalos,

transporta fali ba Ospitál referal Baukau maibé la konsege halo operasaun, nune'e kontinua transporta fali ba Ospitál Nasionál Guido Valdares Dili hodi halo operasaun ba lezadu nian kidan.

Prokuradór akuza arguidu kontra artigu 139 KP kona-ba omisídiu agravadu ho forma tentada tuir artigu 23 KP no konjuga ho artigu 2, 3, 35(b) no 36 LKVD no kontra artigu 20 hosi Lei Nú. 5/2017 kona-ba Arma Brankas.

Produsaun ba prova sira

Arguidu deklarata katak momentu ne'ebá arguidu nian feen mak fó tais ba lezadu nia feen ba fa'an iha merkadu. Bainhira lezadu nia feen fila hosi merkadu dehan tais la folin, maibé arguidu dehan ba lezadu nia feen katak keta nia troka fali ona tais no ho tais seluk. Iha tempu ne'ebá aleinde arguidu no lezadu iha mós sira nia alin ida tan Arlindo da Costa ne'ebé hanoin katak keta lezadu nia feen troka tiha tai's ne'e. Tanba ne'e lezadu rona no sira hahú diskute-malu no arguidu haree ba lezadu baku Arlindo da Costa to'o monu hotu ba rai. Tanba ne'e, arguidu halai ba foti diman iha kuartu laran no sona ba iha lezadu nia kidan loos.

Aleinde ne'e, lezadu kontinua konfirma faktu iha akuzasaun no deklarasaun arguidu katak iha momentu ne'ebá sira na'in rua Arlindo da Costa baku malu no sira monu hotu hafoin arguidu mai sona ho diman iha kidan loos nian. Depoizde akontese lezadu ba tratamentu iha Ospitál Nasionál Guido Varladares, kuaze fulan ida ho balun hafoin rekopera.

Alegasaun finál

Prokuradór haktuir katak arguidu nia hahalok ne'e konstitui nu'udar krime ne'ebé todan. Tuir loloos hanesan maun ho alin, lezadu ho nia alin baku malu, arguidu hanesan terseira-parte ba haketak sira, la'os foti diman sona fali ba lezadu nia kidan. Prokuradór akresenta katak arguidu ninia hahalok rezulta lezadu sofre kanek todan no ba halo tratamentu iha ospitál no lori tempu naruuk foin fila ba uma. Tanba ne'e husu ba tribunal atu kondena arguidu ho pena prizaun tinan lima.

Iha parte seluk, defeza hateten katak arguidu sona lezadu tanba iha motivasaun ne'ebé injustisa iha uma laran. Defeza mós argumenta katak diman refere la'os arguidu nian maibé ne'e sasan beiala sira nian ne'ebé mak eziste no rai-metin antes lei armas brankas ne'e tama iha vigor. Ate agora lei ne'e implementa tiha mós governu la ba rekolla hotu sasan proibida sira ne'e. Tanba ne'e, husu ba tribunál atu kondena arguidu ho pena ne'ebé mak adekuadu.

Desizaun

Depoizde avalia faktu hotu, tribunál prova katak arguidu komete duni krime tuir faktu sira iha akuzasaun no iha produsaun prova katak arguidu komete krime omisídiu agravadu ho forma tentada. Tribunál konsidera katak arguidu halo krime ne'e ho livre no konsientemente uza diman hodi sona iha lezadu nia kidan ne'ebé nu'udar nia-maun rasik no rezulta lezadu sofre kanek todan

no hala'o tratamentu ne'ebé han-tempu naruuk. Tribunál prova katak arguidu kontra Lei Arma Brakas tanba arguidu uza diman sona ba lezadu.

Aleinde ne'e tribunál mós avalia sirkunstánsia atenuante sira hanesan arguidu konfesa faktu hotu, arrepende ona ninia hahalok, diak malu ona ho lezadu no foin primeiravés mai hatan iha tribunál. Bazeia ba konsiderasaun ba faktu sira no sirkunstánsia agravante no atenuante hirak-ne'e, tribunál kondena arguidu ho pena prizaun tinan 8.

19. Krime ofensa ba integridade fízika simples ho natureza violénsia doméstika

Nú. Prosesu : 0016/18. VQOSU
Kompozisaun Tribunál : Singulár
Juis : Dra. Ersilia de Jesus
Prokuradór : Dra. Remigia de Fatima da Silva
Defeza : Dr. Sidonio M. Sarmiento
Tipu pena : Pena prizaun fulan 3 suspende ba tinan 1 fulan 3

Iha 21 Fevereiru 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé involve arguidu CdS hasoru nia feen, iha Distritu Vikeke.

Akuzasaun Prokuradór

Prokuradór akuza katak iha 14 Agostu 2018, maizumenus iha tempu kalan, lezada husu osan ba arguidu atu sosa aimoruk ba labarik ne'ebé moras, maibé arguidu dehan osan laiha. Iha loron tuimai kedas, 15 Agostu 2018, iha tuku 11:00 dadeer, arguidu fila hosi merkadu, sosa ho modo plástiku ida, nune'e lezada husu ba arguidu katak horikalan dehan osan laiha, maibé tanbasá mak ohin sosa modo osan iha fali. Depoisde rona lezada nia pergunta, arguidu basa kedas dala ida iha lezada nia hasan loos, tuku dala ida iha reen-toos no foti ai-kakeu nia sanak baku dala ida iha lezada nia kidan karuk no rezulta lezada sofre kanek ki'ik iha kidan no ba tratamentu iha Sentru Saúde Ossu.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Durante julgamentu, arguidu deklara katak faktu sira ne'ebé akuza ba nia ne'e loos hotu. Maibé arguidu esplika katak iha 14 Agostu 2018 kalan, bainhira lezada husu osan ba arguidu ne'e, arguidu dehan katak nia osan laiha duni. Maibé iha fali 15 Agostu 2018, arguidu ba ajuda ema duir *bola guling* hafoin ema selu US\$ 5.00, nune'e nia sosa tiha modo. Arguidu mós dehan katak iha Ossu, apotik la iha, maibé lezada koalía bei-beik, nune'e arguidu hirus no komete agresauñ hasoru lezada tuir faktu sira iha akuzasaun. Depoisde akontese lezada ba keixa iha polísia no arguidu mós ba tuir

sira diak malu iha eskwadra polísia. Arguidu mak sosa gandapura kose ba lezada nia kidan, to'ogora moris hamutuk nafatin nu'udar feen-laen no arguidu deklarata katak arrepende ba nia hahalok.

Lezada konfirma faktu sira iha akuzasaun no deklarata katak sira hakesuk malu tanba arguidu la sosa aimoruk maibé sosa fali modo. Lezada dehan katak depoisde akontese nia ba polísia no arguidu ba tuir sira diak malu fali iha eskwadra polísia no to'ogora arguidu la baku ona lezada.

Alegasaun final

Prokurador haktuir katak arguidu konfesa faktu hotu iha akuzasaun no konfirma hosi lezada. Tuir loloos arguidu buka dalan seluk atu rezolve problema, la'os halo agresaun hasoru lezada. Tanba ne'e atu prevene arguidu nia hahalok iha futuru atu rezolve dezintendementu no evita uza maneira violénsia, husu ba tribunal atu aplika pena prizaun fulan neen suspende ba tinan ida.

Enkuantu defeza subliña mós katak arguidu konfesa faktu hotu iha akuzasaun. Maibé arguidu klarifika iha Ossu apotik laiha maibé lezada ezije nafatin, nune'e krime akontese. Mezmu nune'e arguidu deklarata katak nia arrepende ba nia hahalok, diak malu ho lezada loron ne'e kedas, moris moris nu'udar agrikultór. Tanba ne'e husu ba tribunál fó pena ne'ebé adekuadu ba arguidu.

Desizaun

Tribunál prova katak arguidu komete duni krime tuir faktu sira iha akuzasaun. Bazeia ba faktu provadu sira ne'e no sirkunstánsia atenuante sira hanesan arguidu konfesa faktu sira ne'ebé akuza ba nia, arrepende ona ninia hahalok, diak malu ona ho lezada no foin primeiravés mai hatan iha tribunál, nune'e tribunál kondena arguidu ho pena prizaun fulan tolu suspende ba tinan ida fulan tolu inklui selu kustu judisiál US\$20.00.

20. Krime ofensa ba integridade fízika simples ho natureza violénsia doméstika

Nú. prosesu	: 0009/17.MNLLA
Kompozisaun Tribunál	: Singulár
Juis	: Dr. Afonso Carmona
Prokurador	: Dra. Remigia de Fatima da Silva
Defeza	: Dr. Jose M. Guterres
Tipu pena	: Pena pizaun fulan 3 suspende ba tinan 3

Iha 22 Feveireiru 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AdC hasoru nia feen, iha Distritu Manatuto.

Akuzasaun prokurador

Prokurador akuza katak iha 07 Setembru 2017, iha tuku 15:00 lokraik, arguidu ho lezada konversa halimar, hafoin lezada tolok halimar arguidu. Ho nune'e, arguidu basa dala rua iha lezada nian

hasan loos no karuk, tuku dala ida iha lezada nian kotuk laran no rezulta lezada monu ba rai no arguidu rasta lezada ba mai iha rai.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'ó tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Durante julgamentu, arguidu deklara katak tuur halimar derrepente lezada tolok arguidu dala barak. Ho nune'e arguidu sente moe no hirus no halo agresaun hasoru lezada tuir faktu sira iha akuzasaun. Maibé arguidu deklara katak depoisde akontese to'ó agora la baku ona lezada. Arguidu arrepente ba nia hahalok, foin primeiravés mai hatan iha tribunál no promete katak sei la baku tan lezada iha futuru. Iha parte seluk lezada mós konfirma akuzasaun no konfirma mós ho arguidu nia deklarasaun katak agora sira diak malu no la baku ona lezada.

Alegasaun finál

Prokuradór haktuir katak iha Tribunál Juridisaun Baukau lor-loron kuaze realiza julgamentu ba krime ho natureza violénsia doméstika. La'os kestaun sira mai iha tribunál no konfesa/rekoñese sira nia sala ka diak malu maibé oinsa atu halo prevensaun ne'ebé forte, nune'e bele eduka sosiedade hotu atu prevene krime hanesan akontese iha futuru. Tanba ne'e, husu ba tribunál kondena arguidu ba pena prizaun fulan tolu suspende ba tinan ida.

Defeza haktuir katak durante moris hamutuk sira nunka toman tolok maluk no hirus malu. Arguidu lakohi husik hela lisaun aat ba oan sira, ne'e mak arguidu hirus lezada nia hahalok no komete agresaun hasoru lezada tuir faktu sira iha akuzasaun. Maibé arguidu mós deklara katak nia arrepente ona nia hahalok no diak malu ona ho lezada. Tanba ne'e, husu ba tribunál aplika pena ne'ebé adekuadu ba arguidu.

Desizaun

Tribunál prova katak arguidu komete duni krime tuir faktu sira iha akuzasaun. Tribunál mós avalia no konsidera sirkunstánsia atenuante relevante sira hanesan arguidu konfesa faktu sira ne'ebé akuza ba nia, arrepente ona ninia hahalok, diak malu ona ho lezada no foin primeiravés mai hatan iha tribunál. Bazeia ba sirkunstánsia hirak ne'e, tribunál kondena arguidu ho pena prizaun fulan tolu suspende ba tinan ida.

21. Krime obstrusaun ba autoridade públika

Nú. Prosesu : 0034/17.BCSIC

Komp Tribunál : Koletivu

Juis : Dra. Ersilia de Jesus, Dr. Afonso Carmona no Dr. Jose Gonsalves

Prokuradór : Dr. Luis H. Rangel da Cruz

Defeza : Dr. Cristovão Nuno Ximenes (advogadu ECM)

Tipu pena : Pena prizaun tinan 3 suspende ba tinan 3

Iha 27 Feveiriu 2019, Tribunál Distritál Baukau prezide julgamentu leitura akordaun ba kazu obstrusaun ba autoridade pública ne'ebé envolve arguidu Thomas Vicram Frans da Costa (estudante) hasoru lezadu Manuel Deonizio dos Santos (mestre) iha Eskola Ensino Sekundaria Pública Nu. 3 Baukau, Sub-distritu Baukau Vila, Distritu Baukau.

Akuzasaun Prokuradór

Prokuradór akuza katak iha 02 Maiu 2017, tuku 09:30 dadeer, lezadu hanesan mestre fó hela informasaun ba alunu sira kona-ba rezultadu avaliadaun ezame nian. Derrepente arguidu tama sala laran, husu-lia ba lezadu katak tanbasá lezadu halo tranferénsia ba arguidu. Hafoin arguidu tebe meja, nune'e meja refere kona iha lezadu nian liman sikun no rezulta kanek no moras. Arguidu mós tebe tan dala ida iha kadeira ne'ebé lezadu tuur hela ba no alunu sira iha sala laran halai namkari hotu no prosesu aprendizazen paradu. Hafoin ida ne'e diretór eskola telefone ba polísia atu halo kedas atuasaun.

Prokuradór akuza arguidu kontra artigu 243 (1) KP kona-ba obstrusaun ba autoridade pública ho nia moldura penál tinan 2 tinan to'o tinan 6.

Produsaun ba prova sira

Arguidu konfesa integralmente ba faktu hotu ne'ebé mak imputa ba nia, arguidu mós deklara ba iha tribunál katak arrepende ba nian hahalok, no perante tribunál arguidu kompromete sei la repete aktu hirak ne'e iha futuru. Arguidu mós deklara ba tribunál katak agora diak malu ona ho lezadu, arguidu hanesan agrikultór halo kantreiru no fulan ida bele hetan osan US\$ 200.00 no foin primeiravés mai hatan iha tribunál.

Lezadu konfirma faktu hotu iha akuzasaun no konfirma mós ho deklarasaun arguidu nian katak agora sira diak malu fali ona tanba sira sei iha relasaun família. Kazu ne'e rezulta lezadu nian liman sikun kanek maibé lezadu la ba halo tratamentu ospital.

Alegasaun finál

Prokuradór deklara katak arguidu komete krime ne'ebé imputa ba nia, arguidu nia relasaun ho lezadu nu'udar mestre. Arguidu mós halo alunu sira seluk trauma no halai namkari, nune'e loron ida tomak prosesu aprendizajen paradu tomak. Ho razaun hirak ne'e, husu ba tribunál atu kondena arguidu ho pena prizaun tinan rua suspende ba tinan tolu.

Defeza haktuir katak arguidu konfesa faktu sira iha akuzasaun integralmente, arguidu koopera diak ho justisa no arguidu laiha antesidente kriminál. Bazeia ba produsaun prova, parte defeza entrega desizaun ba tribunál atu deside.

Desizaun

Depoisde avalia faktu hotu, tribunál prova katak arguidu komete duni krime tuir faktu sira iha akuzasaun. Bazeia ba faktu provadu sira ne'e no sirkunstánsia atenuante sira hanesan arguidu konfesa, arrepende ona ninia hahalok, diak malu ona ho lezadu no foin primeiravés mai hatan iha tribunál, nune'e tribunál kondena arguidu ho pena prizaun tinan tolu suspende ba tinan tolu.

22. Krime ofensa ba integridade fízika simples ho natureza violénsia doméstika

Nú. Prosesu : 0021/18. BCEVN
Kompozisaun Tribunál : Singulár
Juis : Dr. Hugo da Cruz Pui
Prokuradór : Dra. Remigia de Fatima da Silva
Defeza : Dr. Grigorio de Lima
Tipu pena : Pena prizaun fulan 9 suspende ba tinan 1

Iha 28 Feveireu 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia ne'ebé envolve arguidu MG hasoru nia feen, iha Distritu Baukau.

Akuzasaun Prokuradór

Prokuradór akuza katak iha 03 Novembru 2018, tuku11:00 meudia, lezada fila hosi fatin kesi kuda iha área Akadirulale. Bainhira to'o uma arguidu haruka lezada foti nia telemovel iha uma laran. Lezada mós foti telemovel refereáfó-ba arguidu maibé telemovel pila fraku no arguidu hirus no tuda telemovel ba lezada nia isin-loon. Arguidu hamrik tuku dala ida iha lezada nia matan fukun loos, tebe dala ida iha kidan loos. Depoisde ne'e lezada halai informa ba xefe aldeia no xefe aldeia kontaktu polísia Venilale no lori lezada ba tratamentu iha Sentru Saúde Venilale.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Arguidu deklara katak antes ne'e loron finadu, arguidu ho família sira kalan hadeer no han-hemu tua to'o dadeer. Arguidu lanu, hafoin hadeer haree nia telemovel pila/bateria fraku, arguidu husu lezada no lezada kolia barak, nune'e arguidu hirus no halo agresaun hasoru lezada tuir faktu iha akuzasaun. Depoisde akontesimentu ne'e arguidu hanoin fali lezada tanba lezada ba toba fali iha nian tiu nia uma no dadeer arguidu ba tuir kedas no rezolve tuir kultura sira nian. Hafoin sira fila hamutuk ba sira nia uma. Arguidu deklara katak sira iha oan na'in sia, foin primeiravés baku lezada, depoisde akontese to'o agora arguidu la baku ona lezada.

Aleinde ne'e lezada mós kontinua konfirma faktu no motivasaun iha akuzasaun. Lezada hatutan katak tanba deit arguidu nia telemovel pila fraku, nune'e arguidu halo agresaun hasoru lezada.

Maibé lezada haktuir katak iha momentu ne'ebá la iha asuntu ruma urjente atu arguidu halo komunikasaun. Depoisde akontese lezada ba hato'o keixa iha polísia no kontinua ba tratamentu iha Sentru Saúde Venilale, simu aimoruk fila ba toba iha tiu nia uma. Loron tuirmai, arguidu ba tuir lezada iha tiu nia uma no sira rezolve tuir família hafoin sira fila ba uma. Lezada moras kuaze semana ida foin rekoopera fali.

Alegasaun final

Prokuradór haktuir katak arguidu konfesa faktu hotu iha akuzasaun no konfirma hosi lezada. Tuir loloos asuntu ne'e simples hela, tanbasá mak tenke uza violénsia. Tanba ne'e, atu limita arguidu nia hahalok ne'ebé gosta uza liman halo agresaun, husu tribunál atu aplika prevensaun espesial ba arguidu no prevensan jerál ba sosiedade ne'ebé sira hela ba liuhosi kondena arguidu ho pena prizaun fulan neen suspende ba tinan ida.

Defeza haktuir katak arguidu konfesa faktu hotu iha akuazasaun, arrepende ona nia hahalok, diak malu ona ho lezada no akontese to'o agora la baku ona lezada. Aleinde ne'e, sira iha oan na'in sia no foin primeiravés baku lezada. Tanba ne'e husu ba tribunál aplika pena ne'ebé adekuaudu ba arguidu.

Desizaun

Tribunál prova katak arguida komete duni krime tuir faktu sira iha akuzasaun. Bazeia ba faktu provadu sira ne'e no sirkunstánsia atenuante sira hanesan arguidu konfesa, arrepende ona ninia hahalok, diak malu ona ho lezada no foin primeiravés mai hatan iha tribunál, tribunál kondena arguidu ho pena prizaun fulan sia suspende ba tinan ida.

23. Krime ofensa ba integridade física simples ho natureza violénsia doméstika

Nú. Prosesu : 0003/18. BCBCV
Kompozisaun Tribunál : Singulár
Juis : Dr. Afonso Carmona
Prokuradór : Dra. Remigia de Fatima da Silva
Defeza : Dr. Sidonio M. Sarmiento
Tipu pena : Pena prizaun fulan 4 suspende ba tinan 1

Iha 28 Fevereiru 2019, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu AMdC hasoru nia feen, iha Distritu Baukau.

Akuzasaun Prokuradór

Prokuradór akuza katak iha 29 Outubru 2018, tuku 10:45 dadeer, arguidu ho lezada hosi Tirilolo ba Wailili. Bainhira to'o iha Wailili lezada tun atu ba uma, derrepente arguidu tuku dala lima iha lezada nia ulun, tuku dala ida iha matan-fukun, tuku dala ida hasan loos no lezada ko'us hela sira

nian oan no tenta atu tun hosi kareta. Maibé arguidu basa tan dala ida iha ulun. Lezada sente oin nakukun monu ba rai hafoin ema kontaktu ambulansia lori lezada ba Sentru Saúde Wailili.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'ó tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Durante julgamentu, arguidu deklara katak nu'udar motorista ba kareta mikrolet iha tempu hanesan lezada mós hosi uma ba Baukau. Bainhira fila derrepente mensajen ida tama ba arguidu nia telemovel no lezada haree nune'e hahú diskute malu iha kareta laran hosi Buakau to'ó uma Wailili. Arguidu hirus nune'e halo agresaun hasoru lezada tuir faktu iha akuzasaun. Depoisde akontese lezada ba hela tiha semana ida iha nian inan aman nia uma no arguidu ba tuir husu deskulpa no bolu lezada sira moris hamutuk fali to'ó agora. Arguidu arrepende ona nia hahalok, arguidu nu'udar motorista ho saláriu kada fulan US\$150.00.

Entertantu, lezada konfirma faktu hotu iha akuzasaun no depoisde akontese lezada ba tratamentu iha Sentru Saúde Wailili, simu aimoruk fila ba nia inan-aman nia uma kuaze semana ida. Lezada konfirma karak arguidu ba tuir husu deskulpa perante família hafoin sira no fila-fali ba sira nia uma Wailili no to'ó agora la baku ona lezada.

Alegasaun finál

Prokuradór konsidera arguidu provadu komete krime hasoru lezada bazeia ba konfisaun arguidu nian no deklarasaun hosi lezada. Arguidu diak malu ona ho lezada, arrepende ona nia hahalok, arguidu nu'udar motorista iha kapasidade finanseiru. Tanba ne'e, husu tribunál kondena arguidu ho pena multa atu kada loron arguidu selu US\$1.00 durante loron 60.

Enkuantu, defeza husu ba tribunál atu kondena arguidu ho pena ne'ebé kmaan liu, tanba haree ba arguidu konfesa faktu sira, arrepende ona nia hahalok, liu semana ida arguidu diak malu fali ho lezada. Arguidu mós husu deskulpa ba lezada no mós kontinua moris hamutuk to'ó agora.

Desizaun

Depoisde avalia faktu hotu, tribunál prova katak arguidu komete duni krime tuir faktu sira iha akuzasaun. Tribunál avalia sirkunstánsia atenuante sira hanesan arguidu konfesa, arrepende ona ninia hahalok, diak malu ona ho lezada no foin primeiravés mai hatan iha tribunál. Bazeia ba konsiderasaun no sirkunstánsia relevante hirak ne'e, tribunál kondena arguidu ho pena prizaun fulan tolu suspende ba tinan ida.

Ba informasaun liután bele kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.tl

Website: <http://jsmp.tl>